

17/1
VII. Har





Digitized by the Internet Archive
in 2018 with funding from
Wellcome Library

<https://archive.org/details/b30500230>

N^o 52. 44119
D E

PESTE
DISSERTATIO

Physic Habita Apr. 17. 1721.
As a Grant of money made

Bar
IN
1752

Amphitheatro Collegii Regalis
Medicorum *Londinensium.*

Cui accessit

DESCRIPTIO
Inoculationis Variolarum.

A GUALTERO HARRIS ejusdem Collegii Socio,
& Chirurgiæ ibidem PROFESSORE.

L O N D I N I :

Impensis GUL. & JOH. INNYS, in Arcâ Occidentali
D. Pauli. M.DCC.XXI.

BRITISH

LIBRARY



Wellcome Institute for the History of Medicine

100, Gower Street, London, W.C.1

Q 143

1891

1891

1891

1891

ILLUSTRISSIMO

Celeberrimoque Domino,

D^{no} HANS SLOAN Bar^{to},

Collegii Regalis Medicorum Londinensium

P R Æ S I D I,

FREDERICO SLARE,

JOHANNI BATEMAN,

RICHARDO BLACKMORE, Eq. Aur.

TANCREDO ROBINSON Medico Regio
Primario,

JOHANNI HAWYS,

GIDEONI HARVEY, Med. ad turrim Reg.

In eodem COLLEGIO

ELECTORIBUS Dignissimis:

CENSORIBUS etiam Doctissimis,
Cæterisque

COLLEGII SOCIIS Excellentissimis:

Hanc qualemcunque

DISSERTATIONEM,

Salutis Publicæ studio benevolo conscriptam,

Submissè dicat,

Gualterus Harris.

THE UNIVERSITY OF CHICAGO

College of Arts and Sciences

Department of Chemistry

Chicago, Illinois 60637

PH.D.

Thesis

Submitted

to the Faculty of the

Department of Chemistry

in partial fulfillment

of the requirements

for the degree of

Doctor of Philosophy

by

James H. Duerksen

Chicago, Illinois

1981

1981

DISSERTATION

Submitted to the Faculty of the

Department of Chemistry

University of Chicago



DE

PESTE.



U M *Pestis* à Chirurgis, non admodum eruditis, in operibus suis frequenter tractetur; cum tot populos ac regiones, non longè à nobis distitas, nuper vastaverit, miserèq; depopulata sit, anno scil. 1714; cum *Gallia Meridionalis* nunc temporis inauditam quandam vastationem sustinet, idq; imprimis in istis locis, ubi permulti innocentes viri ad remos fuerunt damnati, & cruciatibus ac tormentis variis inhumaniter afflicti, propter conscientiam liberam conservatam ab illicito obsequio, Principis voluntati aut arbitrio: Et cum nemini, nisi *Numini Opt. Max.* sit cognitum, quàm propè Laribus, aut ædibus nostris etiamnum impendeat dira ista Lues,

æquum

æquum utileque nobis videtur, hunc morbum exitialem paucis considerare.

Quod verò ad *Pestem Marsiliensem* attinet, causa naturalis, si non principalis, ejus summæ perniciiei, planè videtur, maxima ibi rei frumentariæ inopia. Etenim cùm provincia illa vineis & olivetis constet, & aratri frugibus sit plurimùm destituta; & propterea illis annona suppeditetur ab *Italiâ*, *Genuâ*, & *Barbariâ*; & cùm prorsus defuerit illis pecunia numerata, propter ejus conversionem *Empyricam*, sive novam *Metamorphosin* in *Schedulas* incerti valoris, quas mercatores peregrini noluerunt accipere pro frumento solvendas, tunc scilicet duo hostes internecini, λιμός & λοιμός conspirabant illos populos conjunctim interficere.

Quisquis *Pestem* copiosissimè & accuratissimè explicatam inspicere cupit, omniumque autorum celebratorum sententias in unum diligentissimè collectas examinare, quoad theoreticam, prophylacticam, & therapeuticam *Pestis* considerationem, cum Problematis ad causas ejus occultas pertinentibus, præ aliis autoribus consulat clarissimum *Diemerbroek*, doctissimè differentem de *Peste*, quæ *Noviomagi* grassabatur anno *Centuriæ* præteritæ trigésimo sexto. Qui illum perlegit, cum annotationibus singulis ejus capitibus annexis, eodem intuitu pænè omnes autores de eâ re conscribentes legit.

Propositum

Propositum jam est nostrum, non alienis methodis insistere, neque autorum sententias excerpere doctèque citare, nisi necessitas quædam id cogit; sed quædam perstringere ad Pestem spectantia, quæ conducere quodammodò possint *Curando* tam sævo morbo, si ita *Deo* placuerit. Nam speculationes inanes, & argutiæ quantumlibet subtiles, minimè conveniunt, aut sunt minùs congruentes, in re gravissimâ, maximeque seriâ.

Pestis est sæpissimè peculiare flagellum *Dei Omnipotentis*, omniaque conspicientis, quo Suprema Bonitas, tandem devictâ Lenitate suâ diuturnâ, aliquandò animadvertit in homines degeneres, & flagitia illorum eo modo severiùs ulciscitur, quàm Belli, Famis, Luis Venereæ, animalium ferorum aut venenatorum ministerio sævire unquam solet. Hanc verò pernicem sæpè cœlitùs infligi, quanquam nupera *Cometologia* nequaquam id fatetur, tamen Cometæ novi ac Meteora aere insolita, in sublime impendentia, & vulgò eam antecedentia, sæpissimè demonstrant aut evincunt. Anno prout memini proximè præcedenti ultimam istam *Pestem*, quæ apud nos grassata est, anno Centuriæ præteritæ sexagesimo quinto, attonitis omnibus diu conspiciebatur horrendus quidam *Cometa*, cujus ardens cauda à capite suo protensa pænè dimidium *Hemisphærii* nostri quotidie implebat. Dirum sanè *Omen*, sive spectaculum,

Etaculum, paulò pòst concomitatum funestâ strage pæne centies mille hominum, *Peste* extinctorum, in unâ hâc urbe, & uno eodemque anno.

Prima Pestis calamitas, in his régionibus miserabiliter invalescens, est quod omnes incolæ eandem domum habitantes, simul ac notum est quenquam esse infectum, omnibus furiis morbi pestiferi statim adjudicentur, unâ incarcerentur, & ab aere salubri ac sereno perfruyendo seclusi prohibeantur. Multò consultius esset, & humanius, si fani ab infecto quamprimùm separarentur, & in domos quasdam, tabernacula, aut *tentoria*, extra urbis pomœria, à Magistratu assignanda, citò relegarentur, ubi seclusionem aliquâ debitâ, aut quadragesimali, & annonâ illis suppeditatâ, securè perfungerentur. Quod si ex illis quempiam contigerit postea corripì isto contagio, aliorsùm, vel in Nosocomia Pesti dicata conveniet illos amandari. Et ejusmodi institutum posse à Magistratu tutò & auspikatò ordinari, sub primam *Pestis* invasionem, liquidò apparebit; quia nullæ *Febres Contagiosæ* solent unquam virus ullum pestiferum diffundere, circiter *primum* illarum insultum, sed morâ aliquâ interpositâ. In *Variolis* ipsis, quæ adeò inficiunt, & populariter serpunt, Contagium non solet aliis disseminari, antequam halitus fœtidi & graveolentes à pustulis maturantibus ac putrescentibus exhalare incipiunt, aut putor aliquis ingratus à corruptis

tis humoribus tandem expiret. Et sic in aliis *Febribus Malignis & Pestilentialibus* afflatus iste Contagiosus nequit se diffundere, & propinquis communicari, donec morbus aliquantisper procedit, donec aut vomitus immanis putridos foetentesque humores palam ejicit, aut vis naturæ vel morbi venenum incutim aut Emunctoria propria expellit, aut donec ulcus, bubo vel anthrax apparet & rumpitur. Quæ quidem res *Magistratus* cognitione, maturaque consideratione sunt dignissimæ: Nè in posterum, ut olim pessimè, complures sani, optimèque valentes, in eâdem domo vel sepulcro, unâ cum homine infecto, præposterè claudantur, morti immaturæ alternatim omnes traditi.

Et hæc nobis eò opportuniùs nunc dicuntur, quia consternatio præsens, à metu *Gallici* Contagii undique se diffudit, terroremque ingentem multis populis ab eo procul diffitis, longè latèque nuper injecit. Et quamvis ab ultimâ *Peste Londinensi* complures jam elapsi sunt anni, *Contagionis* immunes, multòque plures salutare quàm unquam antea apud nos contigerint, tamen benè sperare licet, *Urbem* hanc augustissimam, omnes alias primarias, Regias, aut Imperiales per totam *Europam* dispertitas, magnitudine, opibus, commerciis, incolarumque copiâ, non modicè transcendentem; hanc inquam tantam Urbem, tamque florentem, à *Contagio* Pestilenti jamdiu liberatam, posse multò diutiùs ab eo

B

adhuc

adhuc conservari, si *Deo Optimo Maximo* ita placuerit; quia foetoribus noxiis & inquinamentis, prius infestantibus, per canales subterraneos jam undique expurgatur, & fluvialis aquæ salubris facili introitu pænè omnes *Londini* domus copiosè suppeditantur; & deniq; quoniam *Tutela Divina*, mirandos in modos multos, hoc præsertim seculo, sese exhibuit propitium pro tutandâ & vindicandâ totâ regione *Anglicâ* à periculis diris ac horrendis, non rarò propè impendentibus.

Altera Pestis calamitas, maximèque omnium deploranda, ut mihi quidem videtur, est error non magis popularis quàm fatalis, in ipsâ ejusdem *Curatione*; error, inquam epidemicus, tàm Medicorum nonnunquam doctissimorum & peritissimorum, quàm sæpius medicastrosum imperitorum. Scio hoc paulò liberiùs & audaciùs dictum, arrogantiae maximæ insimulari posse: Sed ut nunquam delector in reprehendendo alienos errores, neque id nunc facio, nisi solius *veritatis* studio, in causâ gravissimâ nunc incitatus; precor equidem vos, consultissimi judices, ut dubitetis saltem, censuramque omnem deponatis, donec hanc rem habeatis certiùs exploratam.

Ut igitur *Curatio Pestis*, favente *Divinâ Benedictione*, nobis clariùs innotescat, distinguendum est imprimis inter *Curationem principio Pestis* congruam, eamque quæ conveniet

niet morbo jam fixo & confirmato. Quod in omnibus Febribus, qualescunque fuerint, sive Continentes, Intermittentes, Inflammatoriae dictæ, & Malignæ, credite mihi, est maximi momenti. Nam tempora morborum omnium, gradusque varii, aliam atque aliam *Curandi* rationem postulant. In principio vires constant, symptomata sunt mitiora, loculusque datur amplissimus peritiæ Medicæ demonstrandæ, constantique ac pæne infallibili medicamentorum certitudini approbandæ. In *Principio* meminisse oportet effatorum illorum axiomatum, aut *Aphorismorum*, semper & ubique ex usu saluberrimo:

Ἄ δεῖ ἄγειν, ὅκῃ ἀν μάλιστα ῥέπη, ταύτῃ ἄγειν, διὰ τὸ συμφερόντων χωρίων. *Sectione primâ.*

Et Ἀρχομένων τῶν νόσων, ἣν τὶ δοκέη κινεῖν κινεῖ. *Sectione secunda.*

Veteres Medici *Principium* Febris computabant esse illud tempus, quo ægrotans consueta vitæ munia obire nequivit, & propterea dejectis suis viribus primò decubuit. Aliquando verò latius primam *Diatritum* sic vocabant; & aliquando totum Febris tempus *Coctionis* signa præcedens. Sed frequentius illi *Principium* Febris determinabant à primo frigore insigniori corporis, & præsertim partium extremarum, symptomatisque id citò concomitantibus, nimirum *Nauseâ* aut *Vomitu*, aut animi quodam deliquio, aut gravi som-

nolentiâ, Vertigine, aut Dolore capitis acerbo, vel alterius partis.

Per *Principium Pestis* equidem intelligo primum diem, quo ægrotans horrore aut rigore corripitur. *Horrorem* illum *Pestilentem* accepimus nonnunquam intra sesquihoram terminari, sed frequentius ultrâ quatuor vel quinque horas permanere. Huic *horrori* vix adhuc cessanti *semper* succedere *Nauseam & Vomitus*, scripsit Hodges, noster Collega, oculatus ille testis *Pestis* postremæ quæ apud nos grassabatur. Et eodem tempore quo *Vomitus* infestabat, *Cephalalgiam* gravem illa Ventriculi perturbati signa usitatè concomitari idem autor narrat.

Itaque maximè notandum est, hæc prævia & primaria *Pestis* symptomata, aliis multis Febribus, *Putridis* dictis, esse communia; semperque propriè indicare usum tempestivum *Emeticorum*. Et in aliis omnibus Febribus, five *Putridis*, five *Synochis*, ubi ab eisdem Symptomatis *Emetica* fuerunt indicata, opportunèque à me data, cum debito regimine operationis, clarè vobis enuncio, bonæque fide affirmo, haud conscius contrarii, nunquam me meminisse, tanto auxilio juvatum, quòd *semel* frustratus fuerim successu exoptato, per ipsam *Febris averruncationem*: Nisi *Variola* sint subsecutæ, aut *Morbilli*, aut Febris fuerit ex *Inflammatoriis*, quæ non nisi dolore consopito, partisque Inflammatione ali-

aliquatenus deletâ relevari & cedere solent. Idque repeto, haud paulisper jam exercitatus, utpotè ætate jam ad vesperam inclinante, cum testimonium solet esse firmum, & cum mundi hujus ineptiis & deceptionibus brevi fuerit valedicendum. Quanquam & neminem *Senectute* reor premi aut laborare, quamdiu facultates animi illæscæ viguerint, aut quousque eidem fuerit *mens sana in corpore sano*. Repeto inquam, quod nunquam ego minerim, cum *Emetica* tutò possint, & primâ die invasionis Febrilis fuerint prudenter exhibita, ea me fefellisse, nè semel quidem.

Itaque addo præterea, cum quinque annuas expeditiones æstivas in *Flandriam* facerem, *Regi Gulielmo* foelicis memoriæ pro facultate inserviens; & cum cura sanitatis totius *Familie Regiæ*, quantumlibet numerosæ, mihi soli peregrè incumberet, durantibus illis æstatibus; verissimè affirmare possum, post plurium domesticorum de eâ re percontationem, me ex tempestivo præsertim *Emeticorum* usu nullum famulum cujuscunque ordinis, è tanto tamque numeroso comitatu, illorum qui è *Britanniâ* in *Flandriam* Domestici quotannis transibant, illis *quinque* annis desiderâsse: Nimirum unusquisque illorum salvus autumno redibat, propter auxilium Medicum habitum tempestivè *in principio*, cum cæteri plures domi commorantes quotannis fortè interibant. Tunc enim temporis illis exhibui solius *Tartari Emetici* panem integram

integram libram, à quatuor ad sex grana pro quâlibet dosi, præter alia *Vomitoria*, unâ eâdemque æstate, semperque optato cum successu; tot inquam, *Emetica Antimonialia*, durante æstate, illis præscripti, qui nè *unam* quidem eorundem dosin, totâ unquam *hyeme*, vomendo contrariâ, aut ausim, aut soleo præscribere.

Pace vestrâ nunc liceat maximâ admiratione fuspicere *Numinis Divini* benignitatem, indignis nonnunquam collatam, & cuius potestas, infinitæ Bonitatis plena, viris perquam imbecillis magnas sæpè vires dignatur suppeditare, pariterque mediocriter in Arte peritis prosperos quandoque successus libenter concedit; quùm Sapiencia illa Cœlestis docta consilia medicorum præclariorum, quantumcunque fuerint salutaria, quoties beneplacito Supremo placet, facile frustratur. Et liceat porrò observare, Medicos rarissimè ex brevissimis, promptissimis, *Optimisque* suis *Curationibus Gloriam* ullam consequi; utpotè quales morbi tam celeriter fugati, suscepto solummodò frigori, & levissimis contemptisque causis deberi ferè existimantur. Sed diuturnæ, perplexæ, & fortè *erroneæ Curationes*, ad exitum fœlicem tandem perductæ, claros & illustres, æquè ac divites, sæpè reddunt. Adeò ut *Benedictio* illa *Pontificia*, utcunque minùs sancta, tamen non insipiens fuerit: *Si mundus vult decipi, decipiatur. Si mundus vult, &c.*

Scio doctos & egregios autores, qui de *Peste* conscripserunt, & qui versati fuerant prius cum *Peste* correptis pænè unanimi consensu improbare *Emetica*: Nimirum verentes nè vis unita morbi & remedii Vomitionem immanem faceret, viresque nimis dejiceret. *Julius Palmarius*, discipulus non inelegans facundissimi *Fernelii*, & qui *Xenodochio Parisiensi* per biennium præfuit, grassante illic Pestilentia, in Libro 2do de Febre Pestilenti, cap. 24. hæc habet: *Quum Vomitio Peste correptos acerbius infestat, sunt qui existiment naturam expultrice ventriculi facultate, quod molestum est, ipsam scilicet Febris causam à se amoliri, ac foras propellere; velintque ejus conatum exhibito Vomitorio medicamento promovere. Sed ii longè falluntur. Nam quò magis urget Vomitio, hoc periculosior febris pestilens esse solet, ut etiam plures vomendi finem non fecerint, donec animam vomendo profuderint. Hactenus vir cum dicendi, tum medendi, non mediocriter peritus. Et facilè Palmario assentior, si Emetica nimis serò exhibeantur, scilicet post primum vel maximè secundum diem ab invasione morbi; si unquam fortiora & Antimonialia, præsertim duranti hyemis rigore, si viribus jam enervatis à morbo vel natura, vel si graviditate, hæmoptysi, herniâ, aut structurâ corporis incommodâ, contraindicantibus, inconsultò propinentur; vel denique si prorsus omittatur aut contemnatur Emeticum, tunc mutua permanet colluctatio*

inter

inter morbum & remedium, & natura interim contendit excutere morbum, & viâ quâ primùm debuit ejici, pergit frustrâ evomere, donec anima tandem vomendo profunditur. Sed notandum est Medicos Gallicos, & maximè *Parisienses*, doctissimos quidem, omnique laude dignissimos, *Emeticorum* quorumcunque usum, ab illo tempore quo *Chymistæ* aureos montes, quod aiunt, Chymicis suis medicamentis temerè pollicebantur, & *Emetica Antimonialia* immodicè venditabant, ejusmodi in genere plusquam convenit reformidâsse, & ab omnibus *Emeticis* nimis abhorruisse, propter perniciem non raram *Benedictorum* illorum *Emeticorum*. Quis verò nescit eosdem Medicos Præclaros *Enematis*, *Venæsectioni*, & *Purgationi*, repetitis, quantumlibet fuerint utilia, temperatè instituta, nonnunquam nimis pertinaciter fuisse? Etenim & ipse juvenis, cùm *Parisiis* olim versarer, ad animum in re Medicâ melius excolendum; & nescio quâ leviusculâ valetudine ibi tenerer, *Catharticis* ocyùs repetitis eò fui debilitatus, ut visu oculorum pænè privatus essem, nisi medicamentis Medicoque spontè valedicens, Diætâ solâ, aereque salubri restitutus fuisset.

Ut autem aliorum opiniones in reprehendis *Emeticis* inter curandam *Pestem* consentientium ego præteream; audiamus è contrâ quæ de *Vomitariis* dixit Collega noster eruditus Dominus *Hodges*, qui deditâ operâ scripsit de *Peste* istâ dirissimâ quæ apud nos

Londini

Londini ultimò debacchata est: De Peste, Sectione septimâ, p. 170, &c.

Quod ad Vomitionem attinet, inquit, Crapulâ precedente, in ventriculo saburrâ humorum noxiorum congestâ, urgente nausêâ, ore etiam amaricanti, consentiente thoracis & cervicis conformatione, in morbi infantia, prodesse queant Emetica remedia, inter quæ illa eminere videntur, quæ ventriculum abundè nimis sarcinatum citrà catharsin subvertant: viz. Syrupus diasari Fernelii, syrupus Scabiosæ compositus, oxymel Scilliticum, sal præsertim Vitrioli, &c. Et pergit, qui de meo consilio serum cerevisiale cum foliis Cardui incoctis addito oxymelite simplici, affatim ingurgitabant, levamen indè & emolumentum illico experiebantur. Hæc Hodges.

Neque ampliùs equidem contendo, quàm ut *Emeticum* mite, tutumque in principio *Pestis*, urgente *Nauseâ* & *Vomitu*, quæ nunquam in eâ defunt, quamprimùm exhibeatur. Etenim testatur ipse *Palmarius*, licèt aversus ab *Emeticis*, *Nauseam* & *Cardiognum* esse symptomata omnibus *Peste infectis communia*, sive *Pathognomonica*. Quod quidem ostendit quàm fragilis & infirma, quàmque tenuis sit vel doctorum virorum *Scientia* & *Peritia*, & quàm omnibus expediat alienos errores facile condonare.

In *Peste confirmatâ*, ad preces ardentissimas decet confugere, vel etiam ad ardentia *Alexipharmaca*.

pharmaca vulgò confugitur, quæ sæpè faces exurentes ferunt incendio præsentì increſcendo, ſed quæ etiam nonnunquam tunc *valebunt*, quantum *valere poſſunt*. Sin fortè effugiat tandem Peſte correptus, ſalus inexpectata debenda eſt Alexipharmaco; ſi pereat, morbus ille fatalis unicè incuſandus eſt. Vide-tis verò, Auditores ſcientiſſimi, quanto ſint uſui *Emetica in Infantiâ Peſtis*, ſi in eâ fuerit aliquod tempus tam innocuum, aut aliter in *principio Peſtis*, ex teſtimonio noſtri docti, oculatique teſtis. Et proſectò perſuaſiſſimus ſum, *Peſtem ipſam* ipſius *Peſtis*, eſſe fatalem & ad mortem timidum, tanti remedii neglectum, pariter atque perpetuum & communem Alexipharmacorum calidorum ſive uſum ſive abuſum, per totum Febris Peſtilentis decurſum.

Emeticum verò, quod maximè vobis laudarem, eſt omnium mitiſſimum, omniumque aliorum, ut ego conjicio, tutiſſimum. *Emetica Antimonialia*, quatenus vehementer ſurſum ac deorſum impellere ſolent, videntur eſſe in *Peſte* ſemper extimeſcenda. Sed *Vitriolum album* probare libet, quatenus in ſe mitiſſimæ eſt operationis, & quatenus tam vis ejus minùs valida eſt, quàm regitur facile ejus operatio: Quatenus etiam vulgò facile parabilis eſt, & pervili aut nullo conſtat pretio; & quatenus facultate quâdam aſtrictoriâ debilem ventriculum poſteà corroboret, neque *Diarrhææ* iſti pernicioſæ extimulandæ,

landæ, quæ ità formidatur, quocunque modo favet, sed potiùs præveniendæ *Diarhæe* in Febribus *Symptomaticæ*, siquid aliud, insigniter prodest, longèque tutiùs id exhibetur, quàm *Vinum Benedictum*, eâ gratiâ laudatum à præclarissimo Sydenhamo, in *Variolis Febribusque Continentibus*. *Vitrioli albi* in pulverem tusi duas vulgò semidrachmas in totidem haustibus aquæ tepidæ solutas, aut potiùs in *Peste* drachmam ejus unam in primo haustu, & in secundo saltem semidrachmam; in haustu, inquam, aquæ tepidæ, aut levis decocti *Cardui Benedicti*, successivè dare videtur convenire; sed ingurgitationem illam immodicam unius *congi* ferè cerevisialis, aut infusionis *Cardui* nunquam laudo nec permitto, nè vomitionibus nimis laceffatur ventriculus, bilis exagitata & ferociens in furias irritetur, aut vis *Emetici* in solvendo humores tunicis ventriculi impactos, nimis obruta infirmetur. Id vomituris ferè injungo, ut duas solummodò libras aquæ, aut ferè cerevisialis, aut ad summum tres, & nonnunquam duas vel tres selibras, neque ampliùs exhauriant.

Eidem intentioni potest commodè intervenire pulvis radicis *Epicacuanne*, ad $\mathfrak{z}\mathfrak{j}$. exhibitus; vel ad $\mathfrak{z}\mathfrak{ss}$. in primo haustu, & post vomitionem semel excitatam repetendo ejusdem $\mathfrak{z}\mathfrak{j}$. vel gr. xv. si modò pulvis, vel pulveres illi propinentur, sine subsequente insulsâ potatione liquoris tenuis copiosi, ut in usum communem imprudenter abiit. Sin

autem in athleticis temperamentis operatio pulveris illius videatur fore nimis debilis, tunc addere illi licet *Tartari Emetici* granum unum aut alterum, ut intendatur ejus operatio.

Dominus *Bernier Gallicus*, in peregrinationibus suis ad regnum *Cachemire*, Paradisum *Indorum* dictum, narrat se *Peste* correptum statim sumpsisse *Butyrum Antimonii*, neque exindè se domi continuasse ultrà tres quatuorve dies. Dicit etiam ibidem, hoc quaecunque *Emeticum in principio Pestis* mirabiles effectus constanter produxisse, in solamen aliorum, quamdiu sibi restaret *Butyri* istius *Cornucopia*. Mirum fanè remedium, miroque nomine *Butyri* donatum, nisi id sit per *antiphrasin*, ut aliæ plures *Chymicæ* præparationes! Sed notandum est maximè, si tam felices & inexpectati successus ex *Caustico* tanto, tamque venenato sumpto, & in quo ferrum & ignis quasi conjunguntur, atque in quo pugiones ensesque acutissimi *Sublimati Corrosivi* facultatibus *Reguli Antimonii* ventriculum vehementer perturbantibus uniuntur, longè meliora equidem ausim augurari ex mitioribus tutioribusque *Emeticis*. Memini me jamdudùm degustasse, sine ullâ deglutitione, *Sublimatum Corrosivum*, aut semel atque iterum, vel fortè ter ad summum, id linguæ meæ extremitati leviter admovisse, ut scilicet experirer, utrùm *Mercurius dulcis*, an *Corrosivus* fuerit, in chartâ repositus; & postea citò

tò insecutam tantam sanguinis totius inflammationem, ut protinùs libram sanguinis è brachio detraherè, proximoque die catharsin adhibere, necesse existimarem, ad inflammationem istam citiùs compescendam; quoniam tunc temporis Munus meum requirebat, ut protinùs attenderem propè *Regem in Flandriam* illicò proficiscentem. Quod sanè infortunium dignissimum ego judico observatione, & commemoratione illorum qui *Solutionem Metallicam* dictam, sive infusionem *Sublimati Corrosivi*, in spiritu vini rectificato, ad virus Venereum alio veneno extinguendum, Lue Venereâ infectis dare non exhorrescunt.

In *Memorabilibus Literatura* non ità pridem apud nos editis, legere contigit epistolam Doctoris *Staar Medici Poloni*, de *Peste* paulò priùs grassante *Cracoviæ*, ubi dicitur quendam Doctorem *Schonbergh*, Medicum ibi clarum, illi narravisse, quòd *plusquam trecentos Peste* correptos curavisset *Cracoviæ*, partim *Emetico* opportunè exhibito, partim cum Elixir quodam ibi descripto. Quod recens testimonium visum est æquum vobis communicare.

Sed ut idem argumentum adhuc nonnihil confirmem, liceat & hoc nunc denique subjungere. Cùm plures olim è *Societate nostrâ* conventum subindè haberemus, de rebus Medicis plerùmque confabulantes, & fortè de *Peste* colloqueremur, egoque tunc dicerem,

cerem, me velle, si Deo placeret, præ aliis omnibus *Emeticum* exhibere in *Principio Pestis*, ac deindè operatione ejus finitâ Bolum *Alexiterium*: Quidam Medicus ex illis sodalibus, nunc defunctus, sententiam nostram maximè confirmavit, dicendo se pro certo accepisse ab ore ipso Medici senilis, qui interfuerat postremæ *Pesti Oxoniensi*, quòd eandem ille Methodum constanter persequens, *vix ac nè vix unum Peste correptum* tunc desiderâisset, cùm tempestivè fuerat illis accersitus.

Nihil dicam de exemplis aliis quæ autores, & inter cæteros clarissimus *Riverius*, proponit in *Centuriis suis Observationum*, eandem rem confirmantia: Nempè ille insigne *Vitrioli* emolumentum ibi significat, neque ille contemnere videtur, sed potius laudare pennæ oleo illinitæ immiſsionem in fauces, ad *Vomitionem* leniter excitandam, in *Principio Pestis*, si alia non sint præstò.

Denique *Ventriculum*, cujus gratiâ *Emetica* solent exhiberi, in *Peste* affligi & plurimùm lædi, æquè ac *Cor* ipsum, certò evincunt non modò *Vomitiones* semper morbum concomitantes, sed *Diarrhææ* istæ fatales toties contingentes, & *ventriculum perturbatum*, ut causam, subsequentes; pariter atque *Singultus* & *Cardialgia*, & præsertim os ventriculi nervosum in apertis nonnunquam cadaveribus repertum *Sphacelatum*.

Et hæc de *Emeticis* paulò fusiùs dicta considerationem omnium diligentem benè merentur, & præsertim illorum qui cum doctissimo *Diemerbroeckio*, aliisque autoribus claris, nimis favent *Diaphoreticis* & *Alexipharmacis* calidioribus exhibendis, *tàm in ipso Pestis principio, quàm secundâ tertiâve die ab invasione.* Quandoquidem error magnus, vel omissio notabilis, in principio Febris tàm periculosæ, non est postea arte Medicâ reparandus, nisi perquam incertò; quemadmodum error in primâ Coctione, juxtâ communem Medicorum sententiam, nequaquam est corrigendus in secundâ vel tertiâ.

De *Emeticis* plus satis. Transeamus jam ad *Alexipharmaca*, quæ habentur in *Peste* unicum *Asylum*, sicubi infecto fuerit *Asylum*, ad quod omnes autores illos vulgò committunt, misereque valentes illi libentissimè confugiant. Quò magis ad Boream migratur, eò magis intendi solet vis fervida *Alexipharmacorum*; adeò ut *Moschi* melioris notæ, sanitate optimâ gaudentes, pro jentaculo quodam, vulgò soleant se reficere, haustu spiritûs vini cum pulvere piperis exaturati: Et quò longiùs descenditur versùs meridiem, eò magis regimini refrigeranti omnes favent; adeò ut juvenes ac mulieres, illis regionibus nati, vix unquam Vinum degustare confuescant, metu infamiæ insequentis. Satis superque *Formularum* doctissimarum, sive ad pompam, sive usum excogitatarum apud auctores

tores facile est corradere vel colligere, si quis illarum copiam velit accumulare. Sed pace vestrâ liceat nonnihil doli, & improbuli artificii suspicari in tot compositionibus medicamentorum redundanter delineatis, totiesque nimis amplis, pomposis, nimisque impensè elaboratis; in re obscuriore, & morbo perdifficili intellectu.

Liceat etiam verecundè *susplicari* communem illum & pænè ubique invalescentem, sive morem, sive errorem, Medicorum doctissimorum perindè atque vulgarium, qui nullam concipiunt spem curandi unquam *Pestem*, calidissimum morbum, utpotè qui Cor, Ventriculum, Cerebrum, totum denique corpus, summâ omnium *Inflammatione*, percellit & labefactat, nisi *per calidissima medicamenta*, Alexiteria sive Alexipharmaca. Certè æquissimum est ea omnia suspicari, cum vulgò tam infausta sint, cum tantæ ægrotantium strages undique contingant, istâ fatali methodo, istisque causticis medicamentis. Propositum generale ejusmodi remediis utendi seu abutendi, semper fuit, ut *Sudores* salutares exindè eliciantur; ut morbus in internis & principibus corporis partibus sæviens ac delitescens, à *centro* ad *circumferentiam* propulsetur & expellatur. Quæ quidem indicatio æquè benè, & longè tutiùs, auxilium suscipit, si quis ad diaphoresin excitandam cupidus lecto se contineat, & idoneis stragulis corpus, ac præsertim pedes, probè tegat, caput pileis laneis benè conte-

ctum

Etum vinciat, & subindè bibat de fero possético Salviato vel Anthosato calefacto.

Quinetiam sunt in usu frequenti Temperata medicamenta Diaphoretica, inter quæ *Testacea* non infimum locum tenent; & quibus propinatis, aut cum *Bolo Armenâ*, *Antimonio Diaphoretico* recenti, paucò sale *Absinthii*, &c. exhibitis, quenquam Inflammatione correptum nemo potest lædere, quandocunque prudenter usurpantur. Neque animo complecti possum, cur his tutis & salutaribus medicamentis posthabitis vel contemptis, *Inflammationem intendentia*, & periculosiora, in *maximâ* omnium *Inflammatione*, fuerint ita usitata.

Quòd verò *Pestis* habenda sit morbus summè *Inflammatorius*, testantur præsertim *Bubones Pestilentes*, de quibus omninò siluerunt, nullamque fecerunt mentionem Medici antiqui, & qui *Bubones* sunt Tumores gravissimè cruciantes, atque in *Abscessus*, legitimam progeniem *Inflammationum* terminantes. Idem etiam comprobant *Carbunculi* & *Anthraces* ardentissimi, carnum putrilagines, & *Stigmata Pestilentialia*, sive *Mortificationes* per corporis superficiem diffusæ, & à summâ *Inflammatione*, *Gangrænas* illas præcedente, oriundas. Neque his obstat, quòd *Pulsus* fuerit in *Peste* sæpè obscurus, exilis, imbecillis & inæqualis, pariter atque nunc plenior, firmus & fortis, juxtà gradus & tempora morbi, quia in *Gan-*

D

grænâ

granâ summam Inflammationem insequente, pulsatio arteriarum diminuitur, & exilis est & obscura, aut prorsus perit.

Quod ad *Sudorem* in *Peste* producendum attinet; ut plurimum satis facile est, si ita sit animus, Sudores in lecto decumbentibus elicere, cum *Pestis* ad sudandum maximè est *proclivis*: Sed non ita facile est pluribus persuadere, ut in sudando satis diu persistant. Etsi enim in aliis Febribus ad diaphoresin propensis, ego disertis verbis clarè & vehementer prædixerim, mortem quibusdam certò citòque adventuram, si *sudorem* profluentem illi *interpellarent*, & lecto intempestivè surgerent; salutem verò & incolumitatem, Deo volenti, fore illis indubitata, si in *Diaphoresi* satis diu perseverarent; tamen nescio quâ pervicaciâ perperam ductos non rarò observaverim quosdam illorum admonitionibus Medicis nolle obtemperare, sed sudores visos paululùm molestos citiùs interrupisse, aut è lecto surgendo, aut stragula ad refrigerium detrahendo: Undè Mortem sibi immaturam ocysimè accelerârunt.

De Sudoribus dicit *Hodges**: *Levamen & emolumentum ab hac evacuatione, modò regularis esset, sive spontanea sive artificialis, tam insigniter emicuit, ut Correpti quotquot superstites, ejus commoda benè nòrint, encomia passim celebraverint. Quasi in*

* *Hodges de Peste, §. 5. de Pestis nuperæ Signis manifestis.*

Peste confirmatâ, nulla alia illi methodus eam curandi videretur conducere, vel posse prodesse, nisi id fit per *Sudores* aut Arte aut Naturâ copiosè profluentes.

Sin autem calida medicamenta ad *sudores* incitandos in hoc morbo velim administrare, Simplicem illam radicem *Serpentaria Virginiae*, propter facultatem ejus diaphoreticam & alexiteriam, multis splendidis compositionibus, aliisque omnibus saltem simplicibus antepondere non vererer, eâ interim lege, ut mediocri quantitate, non nimis liberâ, propter insignem ejus caliditatem, exhiberetur. Et profectò si in quâcunque Arte exercendâ opus sit cautelâ, probitate & integritate singulari, certè in *Arte Medicâ* ea convenit, maximè necessaria est, & præ aliis summè conducit ad *Benedictionem Divinam* impetrandam.

Neque ego vereor palàm profiteri, me in *Febris* vulgaribus fervorum aliorumque tenuis conditionis, non rarò observâsse, infusionem debitam duorum manipulorum florum *Chamaemeli* solorum, aut unâ cum manipulo florum *Sambuci*, aut *Anthos*, in libris duabus aquæ bullientis, illiusque Infusionis uncias quatuor vel sex sæpè sumptas longè plus profuisse talibus febricitantibus, utilesque illis fuisse clariùs & evidentius, quàm aliter observare potui, ex usu frequenti præscriptionum elegantiorum, de quibus nihil certi & explorati

ità potest ritè statui. *Magnificè* igitur *præscribat*, *pulchrâ* scil. *variatione*, *Medicus Politicus*, qui studio quæstûs nimis ducitur, aut qui inani *Gloriolâ* incitatur, & qui *Simplex Honestum* ludibrio habet joculari. Sed qui *Simplem* Religionem colunt, atque innocentiam summam profitentur, audeant *Honestè* agere, & sine quocunque fuco, in rebus maximi momenti, plenisque periculi: Audeant, inquam, innoxie se gerere, & quando æquum videbitur, *Simpliciter* præscribere.

Attamen nollem temerè imminuere meritas laudes magnarum quarundam Compositionum à majoribus nostris egregiis excogitarum, & in usum communem semper in promptu habitarum, sed ad alios longè usus, ad venena, & ad chronicos affectus varios, *non Febres* profligandas inventarum; cùm in febribus contemperandis *Aqua hordei*, juxtâ *Hippocratem*, videtur multis aliis omninò præponi debere. Neque fas est improbare *Antidota* temperata recentiorum, inter quæ *Diascordium* censemus primas obtinere, & singularis esse usûs, siquod aliud Antidotum, adversus *Febrem Pestilentem*.

Nolo vobis tàm doctis, neque convenit, præscripta quæcunque, aut prægrandes Compositiones alienas, nè dicam Formulas proponere. Ejusmodi enim variè componi necesse est, pro varietate Symptomatum, & rerum sic & sic stantium, pro facultate, peritiâ

tiâ & observatione Medici præsentis, & pro viribus valentibus aut invalidis Morbi vel Naturæ: ad *Diaphoresin* scilicet magis vel paulò minùs promovendam. Verùm in hujusmodi præscriptis, si animus esset ea uberiùs exponere, nullam mentionem equidem facerem *Theriace Andromachi* aut *Mithridatii*, propter *Opium* in illis, & maximè in *Theriaca* prædominans, quandoquidem inter *Sudores* tunc eliciendos *Somnus* unanimi consensu interdicitur. Et certum est, *Sudores Febricitantium*, multò magis *Peste correptorum*, nequaquam esse cohibendos, antequam *Symptomata* planè mitescant, neque tunc nisi admodùm lentè, summâque cum cautelâ.

In *Sudore Anglico*, *Peste* quâdam habitâ, quæ apud nos præsertim sæviebat A. D. 1551. cum ex isto *Sudore* octingenti in septimanâ vitas suas derepentè redderent; siqui morbo illo correpti obdormirent, & cui somnolentiæ maximè erant pròni, certo certius perierint. *Antidorus* illius *Pestis* optima fuit & unica, *Sudori* profluenti indulgere, quousque *Febris* fuerit profligata; quod intrâ viginti quatuor horas celeriter illis contigit, & quâ re cognitâ, ac *Diaphoresi* sic satis peractâ, omnes deindè evadebant.

Notandum verò, si *dolor* magnus gravisque partem aliquam corporis peculiariùs affligat, in statu *Pestilentiali*, *Emplastrum Angeli Salæ ad Anthracem*, tempestivè adhibendum,

tum, Venenum foràs attrahet, & evocabit, ut aut sine percussione id evocetur, aut humores confluentes, in inguine, in alis, vel subter aures, in Tumorem & *Abscessum* salutarem tutò coeant. Sic verò illud *Emplastrum* describitur in suo Ternario Bezoardicorum:

R. Gummi Sagapeni, Ammoniacy, Galbani ana ℥iij. Terebinth. coctæ, Ceræ candidæ ana ℥iiijss. Magnetis Arsenicalis subtl. pulv. ℥xviiij. rad. Aronis pulv. ʒj. f. Emplastrum coquendo s. a.

Ad foràs eliciendum venenum, virusque in pus convertendum, inquit, eximiâ specificâque virtute pollet. Magnes ejus Arsenicalis constat ex Arsenici pellucidi, Sulphuris vivi, & Antimonii crudi ana p. æqu. pulveratis, & in matraccio vitreo, in furno arenæ, colliquatis.

Quòd hoc *Emplastrum* adhibitum parti dolorem perpetienti in *Peste*, insignes illas vires constanter habuerit, accepi à Reverendo admodum Doctissimoque viro, sagaci simul & veraci, cui id fuit communicatum à perito Pharmacopolâ, qui usque interfuerat postremæ *Pesti Londinensi*, & qui eodem fuerat usus felici semper cum successu, in *Doloribus illis à Peste abortis*. Sed nescio annon illud *Emplastrum* queat satis potenter attrahere extrorsum humores intus excruciantes, sine opè *Magnetis* istius deleterii. Et in defectu ejus

Emplastri

Emplastri videtur præstans illud *Emplastrum* nostrum, *Diachylon cum gummi*, in eundem finem posse plurimum conducere.

Cùm verò vires prosternuntur, spiritus pessundantur, Corque ipsum in *Peste*, præ aliis morbis, gravissimè afficitur; *Spiritus Cornu-cervi* per se destillatus, videtur inter sudandum summè necessarius. Vel etiam loco aliorum *Cardiacorum*, permittatur mihi laudare *Vinum* maximè *Canarinum* calefactum & temperatè sumptum: Quo *Vino* nos gaudemus & abundamus, vel antehac abundavimus, præ aliis omnibus gentibus, quasi jure nobis solis exhilarandis, & *Melancholiæ* nostrati Epidemicæ leniendæ, id dicaretur. Hoc scilicet *Vinum* descripsit, mirèque prædicavit, gustu quodam elegantissimo, noster doctus Collega, in Libro suo de *Peste*, & cui descriptioni nihil potest ritè addi à combibone studiosissimo; sic verò buccinavit *Vinum* sibi carissimum: *

Sit Vinum adultum, h. e. ætatis mediæ, non vetustate edentulum, sit homogeneous, non mixtum, non castratum, sit mite, sincerum, sit ingentium virium, saporis equalis & vivacis, sit odoris simplicis, gratissimi, velut juglandium recentium, sit minimè ponderosum, in effusione tripudians, inter bibendum nares feriens, & oscula figens labiis, igni admotum ocysimè evolans, nulla post se relinquens faculentia vestigia.

* In Sectione 8vâ.

Hæc *Vini Canarini* maximè idoneus iudex, qui in studio ac contemplatione tam jucundâ confenescens, tandem solebat nonnunquam, ut multa alia *Magna Ingenia*, evigilare, *Lucubrare*, pernoctare. Etenim ille in *Armi-gerum* juvenilem præterequantem incidens in viâ (& quem bis ex *Crapulâ* febricitantem invisisse in Comitatu *Surriæ*, & curâsse mihi contigit) huic facilè persuasit, ut ex equo descenderet, atque *Oinopolium* ingrederentur, ad degustandam selibram *Vini Canarini*, quod quidem ambobus ita perplacuit, ut non discederent ab *Oinopolio*, priusquam illi duo conjunctim *triginta duas selibras* illius *Nectaris* exhausissent, ut id ab obsequioso illo *Generoso* quondam didici.

Sed fortè non tanti refert in curandâ *Peste*, utrùm *Vinum*, quod infectis permittitur, fuerit *Hispanicum*, *Gallicum*, *Italicum*, aut *Lusitanicum*, modò fuerit potentissimum purissimumque sui generis; tunc enim haberi potest *Cardiacum Cardiacorum*, & præsertim si id ægris *calefactum* bibatur. Et si quis voluerit in *Vino* infundere radicem *Serpentariæ Virginianæ*, *Petasitidis*, *Angelicæ*, *Helenii*, *Carlinæ*, *Imperatoricæ*; aut folia *melissæ*, *scordii*, *galegæ*, *rutæ*, *absinthii*, &c. non decebit repugnare.

De viribus *Aceti* ex vino facti multa possunt conscribi, sed ea in præsentia prætereo.
In

In genere verò permittatur dicere, *Aquam* simplicem, *Acetum* etiam, tam Simplex quàm Compositum, (sive fuerit ad præsens Theriacale, Rutaceum, sive aliter Antipestilentiale) *Vinumque* nobile, videri esse tria optimorum, & fortè maximorum auxiliorum internorum, quæ aut Ars aut Natura, in salutem hominum, unquam vel uspiam suppeditavit. De variis *Aceti* viribus & facultatibus, præ aliis autoribus consulamus *Dioscoridem*, lib. 5: cap. 21.

De *Venæsectione* in *Peste* consultò nihil dixi, utpotè qui laudare malui tutum illum *Emeticorum* usum, in principio ejus, cùm ratione non mediocri, tum experienciâ multiplici comprobatum, modumque vulgari tutiorem comparandi *Diaphoresin* in morbo obfirmato, ut & facilem modum *attrahendi extrorsum* humores noxios & excruciantes intus delitescentes, in Tumorem salutarem aut Abscessum; quàm *Experimentum* proponere quodcunque dubium aut *Periculosum*. De hac re qui sententias varias velit examinare, aut dissentaneas componere, præ aliis multis autoribus consulere dignetur *Sydenhamum* & *Diemerbroekium*, utrumque doctissimum peritissimumque Medicum. Et verbo, prior insignia quædam exempla pro incidendâ venâ profert, posterior sanguinis detractionem in totum meritò damnat, tam *Curandæ* gratiâ, quàm *Præservandæ*. Sed notandum est, in patriâ floruisse hunc posteriorem, ubi, suo saltem

E

tempore,

tempore, multis fuit quoddam piaculum sanguinem copiosius vel omninò mittere, in quocunque ferè morbo, non exceptis Inflammatoriis.

Et hæc hæc tènus dicta sint, cum omni debitâ observantiâ, pro alienis aut melioribus sententiis, de *Curatione Pestis* certius aliquantò faciendâ. Siquid autem in hac Dissertatione, de Curatione scil. Morbi reconditi, perrari, & perdifficilis intellectu, jam exciderit, minùs rectè dictum, vel minùs verisimile, quod spero sit pauxillum, viri boni id facilè condonabunt, utpotè paratissimo sententiam, si iniqua fuerit comperta, in melius commutare, & Magnam Veritatem unicè colenti.

Verùm fanè *Natura* est omnibus animalibus benevolentissima, ac præsertim Humano generi, cæterorum Domino constituto, neque quidem assequi possum, cur *Natura* ipsius *Pestis* fuerit reddita crudelior aut immanior in regionibus magis Temperatis, quam sit in Intemperatis. Quòd si Doctrina vel Consuetudo regionum Temperatarum propensos reddat Magistratus vel Medicos, inhumanis illis infectorum cohibitionibus, vel pejoribus medendi methodis, quàm quæ vulgò invalescunt apud barbaras dictas nationes, magisque situ intemperatas, dignemur tandem ab his *honestis* nonnunquam discere, & ab his *ignaris* benè instrui. Nè sit ullis dedecus de sententiâ discedere,

dere, quandocunque est erronea, etsi à pauculis viris probis propterea collaudentur.

Prophylaxis Pestis optima est, fugâ celeri, à contagio, salutis suæ prospicere. Si rerum domesticarum ratio id non permittat, maxima omnium *Prophylaxis* à *Chirurgiâ expetenda* est, longèque tutior, & multis aptior quàm quæ à *Pharmacîâ* desumitur, aut ab ejus Suffumigiis, Odoribus, Amuletis, Antidôtis, aliisque pluribus, quorum nonnulla tunc temporis sunt minimè contemnenda. Et mirè quidem consentiunt autores maximè idonei in *Fonticulis* tunc aperiendis, Præservandi gratiâ.

Mercurialis libro de *Peste* testatur, se innumeros vidisse *Peste* correptos & extinctos, sed neminem illorum omnium vidisse, qui occumberet *Fonticulo* præmunitus, excepto unico Sacerdote. Ille multos alios Medicos de eâdem re interrogavit, qui unanimi consensu idem testimonium perhibuerunt. Affirmat *Hildanus* in *Centuriâ 4tâ Curationum Chirurgicarum*, *Observ. 23.* neminem eorum qui *Fonticulos* in brachiis & cruribus habuerunt, ex *Peste* obiisse *Lausanie*, præter unum aut alterum, summè Cacochymicum; dicitque duos seipsum habuisse *Fonticulos*, alterum in brachio sinistro, alterumque in poplite dextro. Narrat clarissimus *Diemerbroeck* in annotationibus suis ad *Prophylaxin* suam *Chirurgicam*, se insignem *Fonticulorum* utilitatem vidisse in *Peste Noviomagensi*, idque non

modò in hominibus euehymis, verùm etiam in cacochymis, quos illorum ope mirè præservatos vidit. Denique doctus noster *Hodges* * intrepidè asserit, sicut loqui illi placuit, quòd quoties in loca maximè contagiosa se contulerit, toties brachii pars, ubi situs fuit Fonticulus, pessimè cruciaretur, effluente mox sanie, cum dolore pungitivo lancinante; datoque hoc signo Infectionis, se ad *Alexipharmacum* confugere solere. Mitto cætera testimonia in re tam exploratâ.

Sed ad confirmandum ulteriùs *Fonticulorum* usum in *Peste* præveniendâ, nequeo prætermittere Testimonium congruum, prioribus finitimum, neque à proposito nostro prorsus alienum, quod mihi nuper communicavit Celeberrimus Peritissimusque Medicus, vir cum universâ rerum Naturalium cognitione, tum Medendi arte instructissimus, Dominus *Tancredus Robinsonus*, Medicus Regis Serenissimi è Primariis. Ille non ita pridem probè noverat quendam Dominum *Pregestum*, Medicum *Hungaricum*, apud nos ad aliquod tempus commorantem, qui pro certo illi affirmabat, se fuisse versatum cum multis *Peste* correptis, durante illorum *Ægritudine*, & intereà se præstitisse incolummam à Contagio contrahendo, per duo *Setacea* perforata, unum in utroque Inguine; & quem *Præservandi* modum didicerat *Pregestus* à Me-

* In Sectione 8.

dico quodam docto, *Viennæ* medicinam facti-
tantis. Et existimo ea *Setacea*, tanti saltem,
vel plus valere posse ad tuendam Sanitatem,
Fonticulis prædictis, quia duplicem Puris quan-
tatem ex utroque eorum foramine cõgunt
emanare, quàm possint *Fonticuli* fermè effi-
cere. Nihilominus videntur *Fonticuli* in u-
sum communem gestari commodiores. Ele-
ctio alterutrius sit cuilibet pro arbitrio; sed
alterutrum est longè optabilius, quàm discrimen
illud extremum *Pestem* ipsam contrahen-
di, aut temerè periclitandi. Et sanè inter
tantam Calamitatem nequaquam convenit
stultula ista mollities Dominarum delicatula-
rum, quæ aliàs abhorrent à *Fonticulis* quan-
tumlibet necessariis, nè eâ re cognitâ aut ol-
factâ Amantium Honestorum ardor contin-
geret refrigescere.

Quinetiam in *Pestilenti* statu gaudio aliquo
perfundantur, qui *Ulceribus* inveteratis tunc
scatent, vel qui *Herpete*, *Scabie*, *Impetigine*,
aut similibus *Fonticulorum* succedaneis, affici-
untur, utpotè quibus omnibus tunc insignis
aliquis *malo fuit usus in illo*.

Præter *Fontanellas* & *Setacea*, alia quædam
erunt perutilia ad *Præservandum*. Frustulum
Myrrhæ, in ore sæpius detentum, ab afflatibus
Contagiosis, præ cæteris, ut opinor, potest
quempiam conservare. Item fumus tempe-
stivus *Nicotianæ* graveolentis, ab afflatu isto
vene-

venenato contrahendo plurimum tuetur. Fasciculus foliorum *Rutæ* naribus vulgi adhibitus non ineptè accommodatur. Simplicissimus ille haustus *Aquæ Salitæ* videtur antecellere multis remediis pretiosioribus, Bezoardicis dictis, vel absurdè Benedictis. Quandoquidem vulgaris ille haustus, manè jejunis sumptus, plures, ut accepi, reverà reddidit immunes à Contagio, in ultimâ *Peste Londinensi*. Item pulveris radice *Enulæ Campanæ* aliquantulum deglutitum, pauperibus aliisque non erit incommodum, si manè sumatur, & nonnunquam iteretur, mediocri verò quantitate, nè corpus nimis excalfaciat.

Electuarium Præservativum viri integerrimi, *Hermanni Vander Heyden*, descriptum in libello suo *Honesto*, de viribus *Seri lactis*, *Aquæ*, & *Aceti*, notitiam nostram meretur, idque aut consimile potest multis commodè servare. Constat è *Diascordio*, cum pulvere nucis moschatæ, rad. angelic. Zedoar. enul. camp. aliisque, cum aceto, ol. sulph. per campanam, & Syrup. è succ. citri.

Denique maximè notandum est, tempestates anni varias, aliam atque aliam Medicamentorum rationem postulare. In *Æstate* magis conveniunt *Acida*, frigidiora, aut temperatiora: In *Hyeme* potius *Alcalia*, diluentia Calefacta, aut Medicamenta paulò calidiora.

Deus

Deus clementissimè avertat *Contagium* propè imminens ab *Insulâ* hâc *Fortunatâ*, nimirum per Oceanum separatâ à cladibus pestiferis & rapinis, quæ tot Regna non procul dissita longè latèque devastârunt. Et cùm hæc regio *Felicitatis* & *Libertatis* singularis, à *Luporum* aliorumque ferorum animalium rabie omninò liberatur, à feris moribus, turbulentis, & inhumanis, & ab *Avaritiâ* communi omnium deterrimâ (undè exurgunt *omnes Calamitates*) oro nunquam pervadetur & inficiatur.





D E

Inoculatione Variolarum.



INTER tot sermones, in ore omnium nunc habitos, de *Inoculatione Variolarum*, æquum videri possit demùm adjicere, quæ non ita pridem maximâ ex parte dixi, coràm Collegio, in fine Prælectionis de Curatione Variolarum. Siquidem *Inoculationis* ratio simplex & innocentissima, sæculo præterlapso, Experimentis novis summè insignito, ab indoctis populis *Orientalibus* inventa, jam ad nos longè diffitos, *Divinâ Providentiâ*, fuerit deducta ad comparandas, si Deo placeat, Variolas tutas ac benignas. Idque eò opportunius videri possit, quia *Variolæ Confluentes*, inter Nobiles æquè ac vulgares diram stragem apud nos nuper ediderunt: Et quia *Inoculatio* debitè administrata, à *Confluentibus Variolis* contrahendis nunquam non servat incolumes, mirèque tuetur.

Et maximè ad hanc rem spectat, atque Observatione nostrâ est admodum dignum, quod scripsit à *Constantinopoli*, mense Decembris A. D. 1713. Domino Doctore *Woodward*,
Docto

Docto nostro Collegæ, Dominus *Emanuel Timonius*; & quæ ejus Epistola, Latine doctè-que conscripta, paulò post fuit typis mandata in *Transactionibus* editis à *Regiâ Societate*. *Timonius* ille egregius, in Peregrinationibus suis nuperis adeptus fuerat gradum Doctoratus in Medicinâ tam *Oxonii* quàm *Patauii*, & post reditum suum domi, invitabatur esse Medicus *Grandissimo* suo *Domino*, sive Imperatori *Turcico*; sed istum Honorem periculosum, prudentiâ præditus, submisit declinabat. Narrat verò in Epistolâ, *Tartaros*, *Circassios*, *Georgianos*, aliosque populos *Asiaticos*, Barbaros nostris dictos, sed bonos, & Ratione eâdem nativâ ornatos, quâ docti nonnunquam superbiunt, aliosque temerè aspernantur: hos, inquit, populos à quadragintâ tunc retrò annis *Constantinopoli* introduxisse *Inoculationem Variolarum*, ut eam subeuntes in posterum præserventur ab ulteriori metu morbi redituri, & ab omni periculo *Variolarum* deteriorum. Etenim ait mite illud contagium ab *Inoculatione* communicatum, rarò progignere plusquam decem vel viginti Pustulas, & in nonnullis solummodò duas vel tres, & paucissimos illorum centum Pustulis affici; ut verisimile est, aliqualem differentiam contingere posse, ex variis temperamentis, ætatibus, regimine, & diætâ.

Modus *Inoculationis* sic describitur à *Timonio*: “ In cubiculo calido, vernoque tempore
 “ vel autumnali, operator institutus levia
 “ aliquot vulnuscula infligit musculis Bra-
 F “ chii,

“ chiri, aut Radii hominis inficiendi, cum
 “ acu tricuspile, aut nonnunquam phlebo-
 “ tomo. Acum verò trajicit transversim,
 “ Cutimque ille attollit, donec guttæ aliquot
 “ sanguinis è vûneribus extillent. Et tunc
 “ operator locis pertusis immiscet stylo obtu-
 “ so, vel auriscalpio Pus Variolosum, quod
 “ paulò priùs extraxerat è tibiâ vel poplite
 “ sanioris adolescentuli, qui paucis, distin-
 “ ctis & magnis pustulis fuit affectus. Pus
 “ verò colligebat è Pustulis punctis in vas
 “ mundum statim occludendum, & in pe-
 “ ctore tepido ferendum, ad hominem ino-
 “ culandum, nempe ut gutta puris ita ac-
 “ cepti instilletur in singulas partes vulnera-
 “ tas. Denique loci tabo imbuti teguntur
 “ dimidio, corticis Juglandis, qui manet de-
 “ ligatus parti affectæ, per aliquot horas,
 “ nè Pus appositum defricetur, antequam
 “ sanguis inficiatur. Sperata efflorescentia
 “ vulgò se exhibet die septimo ab Inocula-
 “ tione peractâ, & ægrotans interim absti-
 “ net à carnibus, omnique illarum jusculo.”
 Hæc *Timonius* in Epistolâ suâ fusiùs.

Dolendum est quidem, virum tam Bo-
 num ac Benevolum, qui longè remotis popu-
 lis Observationem Medicam tam utilem &
 incognitam, in morbo Epidemico & pericu-
 losiori, voluit primus benignè communicare;
 virum etiam Scientiæ Medicæ tam avidum
 Studiosumque inter gentes illiteratas, ut in
 has terras longinquas, omnibus literis perpo-
 litas, proficisceretur, Doctrinæ promovendæ
 causâ:

causâ: dolendum est, inquam, hunc eximium doctumque Medicum, amplâ fortunâ, multâque rerum copiâ donatum, postquam tot regiones, Regias, & Académias, oculis colustraverat, plenamque habuerat & Philosophicam comprehensionem Boni & Mali necessario contingentis omnibus in hac vitâ versatis, fore Vitæ ipsius tam misere pertæsum, ut in ætate suâ florentissimâ sibi mortem voluntariam non ita pridem conscisceret.

His quæ accepimus à *Timonio*, conjungere libet aliam de hac re narrationem, mihi exinde communicatam à Mercatore nostrati, qui octo annos vixerat apud *Aleppo*, in *Syria*. Ibi uxor *Consulis Gallici* spectandos illi præbuit tres suos liberos, qui Inoculationem subiverant *Constantinopoli*, quo tempore maritus suus fuit Secretarius *Marchioni de Chateaufneuf*, Legatione tunc fungenti versùs *Portum Turcicum*, à Rege *Christianissimo*.

Inoculatio illorum fuit hujusmodi: Operator adibat quempiam Variolis mitibus correptum, in tempestate opportunâ. Plures acus cum filis appensis trajiciebat per Pusculas maturas, quousque ista fila fuerint Pure satis imbuta. Et tunc statim adibat inficiendos, cutimque eorum radebat aciculâ, ad pisi majoris magnitudinem, donec sanguis tantillus è rasâ cute extillaret, quo peracto, filum Pure delibutum particulæ pertusæ paulisper affricabat. Hanc operationem executus est in quatuor partibus faciei illorum puerorum; nimirum in fronte,

in utrâque genâ, atque in mento. Deindè eandem operationem iterabat in ambobus illorum metacarpiis, manuum & pedum; adèò ut quilibet illorum octo vulnuscùla, vel cutis rasuras sustineret: Et è quibus emissariis vel fonticulis, ac præsertim è manibus, Purulentia Variolosa, vel ichor paulatim emanaret. Et sic illi tres, omnesque alii similiter, ad integram sanitatè sunt tutò restituti, sine turpibus istis *signis* quibus plures nostrorum, si evadant, solent deformari.

Sed notandum est, hunc modum inconcinnum sic *Inoculandi* faciem, fuisse phantasticum quoddam inventum bonæ vetulæ Christianæ, quæ diu priùs fuerat in hâc Arte operatrix. Illa scilicet opinata est, suam operationem fore quadantenùs *Consecratam*, meliùsque successuram, si vulnuscùla faciei sanctam *Crucem* repræsentarent. Cæterùm posthabitâ Superstitione fœmineâ, nos instar virorum & prudentium agamus, atque *Brachia* aut *Cru-ra*, à *Corde* remota, non *Faciem* tam vicinam *Cerebro*, signemus aut inficiamus. Neque totidem cutis exulcerationes requiruntur ad contrahendam Contagionem. Eò sufficiunt ulcusculà ad summum duo ad Variolas tutas ac salutares acquirendas.

Hic prætermittere nolui, mentionem facere Exempli insignissimi, ad confirmandum apud nos saluberrimum usum *Inoculationis Variolarum*; quæ adèò tuta & innocua est jam reperta *Constantinopoli*, adèoque universim ibi invalescit,

invalescit, *Experientiâ* fideli illos omnes instruente, ut æquissimus facti *Judex*, & maximè proprius discriminis, siquod fuerit, *Observator*, *Excellentissimus Dominus*, nuper *Legatus Regis Perillustris*, non dubitaret permittere *Filium* suum *unicum*, & *Heredem* (maximum suum *Theaurum*) *Cantagionem Variolosam* ibidem sic contrahere.

Quinetiam idem *Dominus Prudentissimus*, ut *saluti Familiæ suæ Honorabilis* ulterius prospiceret, & fortè etiam ut alios, tanto *Exemplo* proposito, magis animaret, in re tam salubri ad posterum suos *Præservandos*; *Filiolam* suam quinquennem, circiter initium mensis *Maii* jam elapsi, apud nos *Inoculavit*, uno scilicet *vulnuscule* in utroque *brachio* inflicto, ex operâ *Domini Maitland*, ejusdem sui *Chirurgi*, qui eandem operationem prius executus est, in dilecto suo *Filio* apud *Constantinopolitanos*, & utramque eodem felici cum *successu*. *Testari* equidem possum, hanc tenebram *Dominam* mitissimo *Variolarum* genere fuisse affectam, usqueadeò ut morbus illam non postularet interdum lecto decumbere; neque potui annumerare plusquam *duodecim Pustulas* totam ejus faciem pulcherrimam obsidentes, & similiter paucissimas vidi per corpus artusque dispersitas, vix eas dignas enumeratione.

Sed maximè notandum est, tenuem moderatamque *Diætam*, (carnibus scilicet interdictis, unâ cum vino & liquoribus spirituosus) inter

ter hoc Contagium contrahendum, æquè ac alios afflatus Variolosos, esse summè necessariam; & calida omnia medicamenta, ad expellendas scil. Variolas ingurgitata, in his quemadmodum in aliis casibus, perniciem maximam inferre, & pro Pustulis è cute, ægrotantes ex rerum naturâ, solere frequenter exturbare. Apud *Orientales* populos, ubi in usum abiit *Inoculatio*, *Cardiaca* ista desunt, neque ea concupiscunt. Sed in *Britanniâ*, ubi non modò omne vulgus, sed & multi superiores in omnibus ferè *Febribus*, perindè ac *Variolis*, perpetuo *Cardiacorum* desiderio incenduntur, videtur esse summè necessarium, ubi perficitur *Inoculatio*, ut serua fidelis adsit, quæ diligenter observet, nè *Nutrix* arrogans *Cardiaca* sua calida, ad expellendas præproperè Variolas, furtivè introducat. Idque eò magis in hoc genere observandum, quia nunquam ante septimum, & sæpius die octavo vel nono, benignæ hæ *Variolæ* solent prodire vel erumpere.

Notandum etiam *Constantinopolitanos*, quò melius explorarent, an *Variola* possent postea corripere prius infectum, *bis vel ter Inoculasse*, *Experientiæ gratiâ*, eundem hominem, qui prius fuerat *Inoculatus*; sed illud semper tentatum irritò conatu. Nulla postea subsequetur partis incisæ rubedo aut inflammatio, neque Pus in putamine nucis inclusum & parti adhibitum, iterum attrahetur in vulnus absorbendum. Quæ quidem est indulgentia benignissimæ Naturæ, ut non permittat quenquam mortalium bis quocunque modo contrahere *veras ac genuinas*

inas *Variolas*, vel in summum vitæ discrimen bis ex illo morbo incidere. Quòd si instantia singularis contrarii nonnunquam, licèt rarissimè, apud nos contingat, ut plura ejusmodi dissimilia vidisse contigit, id prodigioso partui, vel ostento cuidam insolito sit comparandum. Quamvis enim *Leges Naturæ* sint fixæ & determinatæ, tamen *Supremus Naturæ Mundique Rector*, pro beneplacito suo Sapientissimo, potest eas *Leges* suas suspendere, perrumpere, & immutare. Et hæc de *Inoculatione Variolarum* nunc sufficiant.

Sed & præter *Inoculationem* illam *Turcicam*, mos est alius, etsi minùs laudabilis, apud *Chinenses*, *Variolas* benignas contrahere, molliter intrudendo in nares Infantum aut Puerorum, inter dormiendum, turundam è Gossipio parvulam satìs imbutam Pure è Pustulis punctis collecto. Et hic illorum mos, si modò tutus esset, neque Cerebrum offenderet, quod quidem suspicarer, delicatulis Dominis pergratus foret, nullis scilicet Vulnusculis cuti impressis.

Denique alia invalescit consuetudo apud *Chinenses*, maximè omnium laudabilis, & quam omnibus fœminis utero gerentibus, omnibus maximè obstetricibus, perindè ac Medicis, etiam atque etiam commendare libet, cui nulla exceptio potest ritè objici, & quam nemo potest meritò vituperare. Hoc perhibetur à *Chinensibus* præservare à contagio *Variolarum* unquam contrahendo per totam hominis vitam, utcunque illæ fuerint ità Epidemicæ, omnibus mortalibus

talibus à *Gadibus* usque ad *Gangem* & *Japoniam*. Nimirum in ipso Partu, cum Infans in lucem sit recens editus, ante sectionem Vasorum Umbilicalium à Placentâ, ut & sectione peractâ ante illorum deligationem, diligenter curandum est, ut Sanguis iste menstruus & vitiosus, ratus à Medicis *parens Variolarum* communis, leni compressione exprimatur *extrorsum*. Etenim Docti Medici, & speciatim *Sennertus* doctissimus, imprudenter consulunt, ut Sanguis in Vasis Umbilicalibus contentus comprimatur *introrsum* versum Infantis umbilicum, ante vasorum à placentâ abscissionem; cum eadem operâ iste sanguis, ante sectionem, æquè possit comprimi ab umbilico, & post sectionem possit exprimi. Et hic mos illorum innocuus, penes illos efficax habitus, saltem adinstar nugatorii quorundam incantamenti, ad Febres Intermitientes profligandas nonnunquam gestati, si forte minus valeat, proculdubio minimè nocebit.

Verum ex tantillâ causâ, vel cautelâ, in Principio vivendi observatâ, prohiberi posse adventum morbi tam terribilis, omnibusque impendentis, credunt vel conjiciunt Sagaces illi *Chinenses*, qui præ se ferunt prædicere à Pulsu, quot horas diesque ægrotus vitam ducet, & quot annos vir sanus possit in hac vitâ versari, vitatis casibus fortuitis, & violentiâ externâ; sed qui etiam impudentissimè putant, vel dicunt, se *Solos duobus* oculis cernere, alios omnes populos solummodò uno.

magp
oo
bag 909
909

